



МОНГОЛ УЛС
САНХҮҮГИЙН ЗОХИЦУУЛАХ ХОРООНЫ
ТОГТООЛ

2014 оны 05 сарын 04 өдөр

Дугаар 160

Улаанбаатар хот

“Хаалттай ХК-ийн хувьцааг бүртгэх, хадгалах, өмчлөх эрх шилжүүлэх үйл ажиллагааны журам” батлах тухай

Санхүүгийн зохицуулах хорооны эрх зүйн байдлын тухай хуулийн 6.1.2, Компанийн тухай хуулийн 3.8-д заасныг тус тус үндэслэн Санхүүгийн зохицуулах хорооноос ТОГТООХ нь:

1. “Хаалттай ХК-ийн хувьцааг бүртгэх, хадгалах, өмчлөх эрх шилжүүлэх үйл ажиллагааны журам”-ыг хавсралтаар баталсугай.

2. Батлагдсан журмыг хэрэгжүүлж ажиллахыг “ҮЦТТХТ” ХХК /Т.Гандулам/-д, хэрэгжилтэд хяналт тавьж, олон нийтэд мэдээлэхийг Ажлын алба /Х.Бум-Эрдэнэ/-нд тус тус даалгасугай.

ДАРГА



Д.БАЯРСАЙХАН

000163

Санхүүгийн зохицуулах хорооны 2014 оны
5 дугаар сарын 07-ны өдрийн 60 дугаар тогтоолын хавсралт

ХААЛТТАЙ ХК-ИЙН ХУВЬЦААГ БҮРТГЭХ, ХАДГАЛАХ,
ӨМЧЛӨХ ЭРХ ШИЛЖҮҮЛЭХ ҮЙЛ АЖИЛЛАГААНЫ ЖУРАМ

НЭГ. НИЙТЛЭГ ҮНДЭСЛЭЛ

УХА0410 5043230

1.1 Энэ журмаар үнэт цаасны хадгаламжийн үйл ажиллагаа эрхлэх байгууллага /цаашид “хадгалагч” гэх/-д хаалттай хувьцаат компани /цаашид “хадгалуулагч” гэх/-ийн хувьцааг бүртгэх, бүртгэлд өөрчлөлт оруулах, бүртгэлээс хасах болон үнэт цаасаар гэрчлэгдсэн өмчлөх эрх болон уг эрх бусдад шилжсэнийг бүртгэхтэй холбогдсон харилцааг зохицуулна.

1.1. Энэхүү харилцаанд Иргэний хууль, Үнэт цаасны зах зээлийн тухай хууль, Компанийн тухай хууль, болон Санхүүгийн зохицуулах хороо /цаашид “Хороо” гэх/-ны холбогдох журмыг удирдлага болгоно.

1.2. Энэхүү журмаар зөвхөн Компанийн тухай хуулийн 3.8-д заасан хаалттай хувьцаат компанийн хувьцааг бүртгэхтэй холбоотой харилцааг зохицуулах бөгөөд нийтэд санал болгон гаргах үнэт цаас, хаалттай хүрээнд санал болгон гаргах өрийн хэрэгслийг бүртгэх, хадгалах харилцааг зохицуулахгүй болно.

ХОЁР. НЭР ТОМЬЁО

2.1. Энэхүү журамд заасан дараах нэр томъёог дор дурьдсан утгаар ойлгоно.

2.1.1. “хадгалагч” гэж үнэт цаасны төвлөрсөн хадгаламжийн үйл ажиллагаа эрхлэх тусгай зөвшөөрөл бүхий хуулийн этгээдийг;

2.1.2. “хадгаламж” гэж үнэт цаасны төвлөрсөн хадгаламжид үнэт цаасыг тоо ширхэг, нэгдсэн дугаар, хувьцаа эзэмшигчдийн нэр хаягаар нь биет бусаар буюу электрон хэлбэрээр тусгай бүртгэл хөтлөн хадгалах цогц хадгаламжийг;

2.1.3. “биет бус үнэт цаас” гэж тусгайлан хэвлээгүй, бүрдүүлбэр нь тооцоолох машины санах байгууламжид байгаа үнэт цаасыг;

2.1.4. “хүсэлт гаргагч” гэж өөрийн хувьцаагаа бүртгүүлэн хадгалуулахаар хадгалагч байгууллагад хүсэлт гаргасан хуулийн этгээдийг;

2.1.5. “хадгалуулагч” гэж Компанийн тухай хуулийн 3.8-д заасан хаалттай хувьцаат компанийг;

2.1.6. “хууль хяналтын байгууллага” гэж шүүх, прокурор, цагдаагийн байгууллагыг.

ГУРАВ. ХУВЬЦААГ БҮРТГЭХ

3.1. Энэхүү журмын 2.1.4-д заасан компани нь үнэт цаасны хадгаламжид бүртгүүлэх хүсэлтийг дараах баримт материалын хамт хадгалагч талд гаргана.

3.1.1. хувьцаа бүртгүүлэх хүсэлт /хавсралт-1/

3.1.2. компанийн хэлбэрийг хаалттай хувьцаат компани болгон шийдвэрлэх тухай эрх бүхий байгууллагын шийдвэр;

3.1.3. улсын бүртгэлийн гэрчилгээний нотариатаар гэрчлүүлсэн хуулбар;

3.1.4. компанийн дүрмийн нотариатаар гэрчлүүлсэн хуулбар;

3.1.5. компанийн хувьцаа эзэмшигчдийн хувьцааны талаарх дэлгэрэнгүй мэдээлэл;

3.1.6. компанийн болон түүний салбар, төлөөлөгчийн газрын эрх бүхий албан тушаалтан, холбоо барих үнэт цаас хариуцсан ажилтны анкет;

3.1.7. компанийн татвар, шүүх болон бусад эрх бүхий байгууллагад хугацаа хэтэрсэн өртэй эсэх талаарх лавлагаа;

3.1.8. зээлийн барьцаанд үүргийн гүйцэтгэл хангуулахаар хувьцаагаа барьцаалсан эсэх лавлагаа;

3.1.9. төлөөлөн удирдах зөвлөлийн гишүүдийн болон компанийн засаглалыг хэрхэн хэрэгжүүлэн ажилладаг талаарх мэдээлэл.

3.2. Хүсэлт гаргагч нь журмын 3.1-т заасан баримт бичгийг Монгол хэл дээр үнэн зөв хоёр хувь бүрдүүлж хадгалагчид албан бичгээр хүргүүлнэ.

3.3. Хадгалагч нь хүсэлт гаргагчаас ирүүлсэн бичиг баримтыг хянаж, энэ журамд заасан бүрдлийг бүрэн хангасан гэж үзвэл хувьцаа бүртгүүлэх хүсэлтийг ажлын 10 хоногт багтаан шийдвэрлэнэ.

3.4. Хадгалагч хүсэлт гаргагчийн хувьцааг бүртгэхээс татгалзсан тохиолдолд татгалзсан үндэслэл бүхий тайлбарыг албан бичгээр ажлын 5 хоногт багтаан хүсэлт гаргагчид хүргүүлнэ.

3.5. Хадгалагч нь Хорооны 2013 оны 280 дугаар тогтоолоор баталсан “Хаалттай хувьцаат компанийн тухай журам”-ын 3.1-д заасны дагуу компанийн ирүүлсэн эх баримт бичгийн нэг хувийг Хороонд заавал ирүүлнэ.

3.6. Энэхүү журмын хавсралт 2-т заасан мэдээлэл нь хувьцааг бүртгэх шийдвэрийн салшгүй хэсэг байна.

ДӨРӨВ. ХУВЬЦААГ ТӨВЛӨРСӨН ХАДГАЛАМЖИД ХАДГАЛАХ

4.1. Хадгалагч нь хадгалуулж буй хувьцааг төрөл тус бүрээр нэгдсэн дугаар (код) өгч хадгаламжид бүртгэнэ.

4.2. Хадгалагч нь хадгалуулагчтай хувьцааны хадгаламжийн болон түүнтэй холбогдолтой төлбөр гүйцэтгэх гэрээ байгуулна.

4.3. Энэхүү журмын 4.2-т заасан хувьцааны хадгаламжийн гэрээнд хадгаламжийн хэлбэр, хадгалуулах хувьцааны төрөл, тоо ширхэг, хадгаламжийн үйлчилгээний хөлсний хэмжээ, хөлс төлөх хугацаа, хадгаламжийн гэрээг цуцлах нөхцөл, гэрээгээр хүлээсэн үүргийг гүйцэтгээгүйгээс үүсэх хариуцлагыг тодорхой тусгасан байна.

ТАВ. ХУВЬЦААНЫ БҮРТГЭЛД ӨӨРЧЛӨЛТ ОРУУЛАХ

5.1. Дараах тохиолдолд хадгалуулагчийн хувьцааны бүртгэлд өөрчлөлт оруулна.

5.1.1. хадгалуулагч нь нэмж хувьцаа гаргах эсхүл хувьцааг хэсэгчлэн хасах тухай шийдвэр гаргасан;

5.1.2. хадгалуулагч нь нэгдэх, нийлэх, хуваах, тусгаарлах болон өөрчлөх замаар өөрчлөн байгуулагдсан;

5.1.3. хадгалуулагч нь хувьцааг хуваах, нэгтгэх, нэрлэсэн үнийг өөрчлөх тухай шийдвэр гаргасан;

5.1.4. бүртгэлтэй хувьцааны нэр өөрчлөгдсөн;

5.1.5. хууль, холбогдох журамд заасан бусад үндэслэл.

5.2. Хадгалуулагч нь хувьцааны бүртгэлд өөрчлөлт оруулах тухай хүсэлтийг энэхүү журмын 5.1-д заасан өөрчлөлт орсон өдрөөс хойш ажлын 10 хоногт багтаан холбогдох баримт бичгийн хамт хадгалагчид гаргана.

5.3. Хадгалагч нь энэхүү журмын 5.2-т заасан баримт бичгийг ажлын 5 хоногт хянан шийдвэрлэнэ.

5.4. Хадгалагч нь шаардлагатай гэж үзвэл бүртгэлд өөрчлөлт оруулахтай холбоотой нэмэлт баримт бичгийг ирүүлэхийг хадгалуулагчаас шаардаж болно.

5.5. Энэхүү журмын хавсралт 3-т заасан мэдээлэл нь хадгалагчийн хувьцааны бүртгэлд өөрчлөлт оруулах тухай шийдвэрийн салшгүй хэсэг байна.

ЗУРГАА.ХУВЬЦААГ БҮРТГЭЛЭЭС ХАСАХ

6.1. Хадгалуулагчийн хувьцааг дараах тохиолдолд хадгаламжаас хасна.

6.1.1. компанийн хэлбэрийг өөрчлөх тухай шийдвэр гаргасан;

6.1.2. хадгалуулагч нь дампуурсан, татан буугдсан, эсхүл дампуурах, татан буулгахтай холбоотой ажиллагааг эхлүүлсэн, дампуурлын хэрэг гүйцэтгэгч, татан буулгах комисс томилогдсон;

6.1.3. Дампуурлын тухай хууль, Банкны тухай хуульд заасны дагуу хууль хяналтын байгууллагын шийдвэр гарч, хадгалуулагчид хэрэг гүйцэтгэгч, бүрэн эрхт төлөөлөгч, эрх хүлээн авагч томилсон.

6.2. Хадгалуулагч нь хувьцаагаа үнэт цаасны хадгаламжийн байгууллагын бүртгэлээс хасуулах асуудлыг хувьцаа эзэмшигчдийн хурлаар хэлэлцэн шийдвэрлэнэ.

6.3. Хадгалуулагч нь хувьцаагаа бүртгэлээс хасуулах хүсэлтийг холбогдох баримт бичгийн хамт хадгалагчид гаргана.

6.4. Хадгалагч нь хувьцааг хадгаламжаас хасахтай холбоотой шаардлагатай гэж үзсэн нэмэлт баримт бичгийг ирүүлэхийг хадгалуулагчаас шаардаж болно.

6.5. Хадгалуулагч нь хувьцаа эзэмшигчийн өмнө хуулиар хүлээсэн аливаа үүргээ биелүүлээгүй нь түүний хувьцааг хадгаламжийн бүртгэлээс хасахгүй байх үндэслэл болно.

ДОЛОО. ХУВЬЦААНЫ ӨМЧЛӨХ ЭРХИЙН БҮРТГЭЛ ХӨТЛӨХ

7.1. Хадгалуулагчаас ирүүлсэн албан бичиг, цахим болон хэвлэмэл хэлбэрээр ирүүлсэн хувьцаа эзэмшигчдийн дэлгэрэнгүй бүртгэлийг үндэслэн хадгаламжид хувьцаа эзэмшигч тус бүрийн нэрээр үнэт цаасны тоо ширхэгийн дагуу бүртгэлийг хөтлөнө.

7.2. Үнэт цаасны төвлөрсөн хадгаламжид дансаа нээлгээгүй хувьцаа эзэмшигчийн үнэт цаасыг хадгалуулагчийн дансанд түр бүртгэнэ.

7.3. Хадгалагч нь баримт хүлээн авсан дэс дарааллыг баримтлан өмчлөх эрх бүртгэх үйл ажиллагааг цахим тооцоолуурын сүлжээний тусламжтайгаар гүйцэтгэнэ.

НАЙМ. ӨМЧЛӨХ ЭРХ БУСДАД ШИЛЖСЭНИЙГ БҮРТГЭХ, ТҮҮНД ТАВИГДАХ ШААРДЛАГА

8.1. Хувьцааны өмчлөх эрх шилжүүлэн авч байгаа этгээд өмчлөх эрх шилжүүлэн бүртгүүлэх хүсэлтийг холбогдох баримт бичгийн хамт ажлын 5 хоногийн дотор хадгалагч байгууллагад гаргана.

8.2. Хадгалагч нь хувьцаа худалдах, худалдан авах гэрээ, өв залгамжлах эрхийн гэрчилгээ, бэлэглэлийн гэрээ, хууль хяналтын болон эрх бүхий байгууллагын тогтоол шийдвэрийг үндэслэн өмчлөх эрхийг шилжүүлж бүртгэл хөтлөнө.

8.3. Хадгалагч нь худалдах, худалдан авах гэрээний дагуу дараах баримтыг үндэслэн хувьцааны өмчлөх эрх шилжсэнийг бүртгэнэ.

8.3.1. худалдах, худалдан авах гэрээний нотариатаар гэрчлүүлсэн эх хувь;

8.3.2. худалдах, худалдан авах гэрээний дагуу хийгдсэн төлбөр төлөгдсөн баримтын хуулбар эсхүл бэлнээр төлсөн бол нотариатаар гэрчлүүлсэн хуулбар;

8.3.3. талуудын цахим үнэмлэхний нотариатаар гэрчлүүлсэн хуулбар.

8.4. Хадгалагч нь хувьцааны өмчлөх эрхийн бүртгэлд өв залгамжлалаар өөрчлөлт оруулах тохиолдолд дараах баримтыг үндэслэн хувьцааны өмчлөх эрх шилжсэнийг бүртгэнэ.

8.4.1. өвлөгчийн өв хүлээн авахыг хүссэн өргөдөл;

8.4.2. өв залгамжлах эрхийн гэрчилгээ;

8.4.3. өвлөгчийн цахим үнэмлэхний хуулбар;

8.4.4. өвлүүлэгчийн гэрээслэл.

8.5. Хадгалагч нь өв нээгдсэн тухай мэдэгдэл ирсэн тохиолдолд өвлөгчид шилжих хүртэл хугацаагаар өвлүүлэгчийн данснаас гүйлгээ хийхийг хориглоно.

8.6. Хадгалагч нь хувьцааны өмчлөх эрхийг бэлэглэлээр бүртгэх тохиолдолд Санхүүгийн зохицуулах хорооны 2007 оны 162 дугаар тогтоолоор баталсан “Үнэт цаасаар гэрчлэгдсэн өмчлөх эрхийг бусдад бэлэглэх, өвлүүлэх тухай” журамд заасан баримт, материалыг үндэслэн бүртгэнэ.

8.7. Хадгалагч нь хууль хяналтын болон эрх бүхий байгууллагын хүчин төгөлдөр тогтоол, шийдвэр эсхүл үл маргах журмаар өмчлөх эрх шилжсэнийг бүртгэх тохиолдолд дараах баримтыг үндэслэнэ.

8.7.1. хувьцаа эзэмшигчийн хүсэлт, гэрээ дүгнэсэн акт;

8.7.2. шүүхийн шийдвэр, гүйцэтгэх хуудас.

8.8. Хадгалагч нь энэхүү журамд заасан өмчлөх эрхийн гүйлгээтэй холбоотой баримтын бүрдэл, шаардлага хангасан тохиолдолд өмчлөх эрх шилжсэнийг бүртгэх бөгөөд шаардлага хангаагүй тохиолдолд өмчлөх эрх шилжүүлэн бүртгэл хийхээс татгалзах эрхтэй.

8.9. Гүйлгээний баримт шаардлага хангахгүй тохиолдолд баримтын бүртгэл хөтлөж буцаан хүлээлгэн өгнө.

ЕС. ХУВЬЦААГААР ГЭРЧЛЭГДСЭН ӨМЧЛӨХ ЭРХЭЭР ҮҮРГИЙН ГҮЙЦЭТГЭЛ ХАНГАХ

9.1. Хаалттай хувьцаат компанийн хувьцаа эзэмшигч нь өөрийн эзэмшиж буй хувьцаагаар үүргийн гүйцэтгэл хангуулахаар зээлийн барьцааны зүйлд бүртгүүлж болох бөгөөд энэ тохиолдолд дараах шаардлагыг хангасан байна.

9.1.1 дансны үлдэгдэл нь үүргийн гүйцэтгэл хангах хувьцааны нэр төрөл, тоо ширхэгтэй хүрэлцэхүйц байх;

9.1.2 тухайн гүйлгээг хийх хугацаанд уг хувьцаа тусгаарлагдаагүй байх.

9.2. Хаалттай хувьцаат компанийн хувьцаа эзэмшигч нь өөрийн эзэмшиж буй хувьцааг зээлийн барьцаанд тусгаарлуулах бүртгэл хийлгэхэд дараах баримтыг бүрдүүлнэ.

9.2.1. үүрэг гүйцэтгүүлэгчийн хүсэлт;

9.2.2. хувьцаа эзэмшигчийн өөрийн эзэмшиж буй хувьцаагаар үүргийн гүйцэтгэл хангахыг зөвшөөрсөн тухай батламжийг 3 хувь үйлдэж, нотариатаар гэрчлүүлсэн байх;

9.2.3. хэрэв хуулийн этгээд өөрийн эзэмшлийн хувьцааг зээлийн барьцаанд тусгаарлуулах тохиолдолд тухайн компанийн эрх бүхий байгууллага /төлөөлөн удирдах зөвлөл байхгүй бол гүйцэтгэх захирал/-ын шийдвэр;

9.2.4. талуудын хооронд байгуулсан нотариатаар гэрчлүүлсэн зээлийн болон барьцааны гэрээ.

9.3. Хадгалагч нь хувьцааг үүрэг гүйцэтгэгчийн хүсэлт, талуудын гэрээ дүгнэсэн актыг үндэслэн тусгаарлалтаас чөлөөлнө.

9.4. Хадгалагч нь хувьцааг тусгаарлан бүртгэсэн болон тусгаарлалтаас чөлөөлсөн тухай мэдэгдлийг үүрэг гүйцэтгүүлэгчид албан бичгээр мэдэгдэнэ.

9.5. Хадгалагч нь үүрэг гүйцэтгэгчийн гэрээгээр хүлээсэн үүргээ биелүүлээгүй тохиолдолд үүрэг гүйцэтгүүлэгчийн дансанд дараах баримт, бичгийг үндэслэн хувьцааг шилжүүлнэ.

9.5.1. зээлийн гэрээ дүгнэсэн акт;

9.5.2. шүүхийн хүчин төгөлдөр шийдвэр.

9.6. Гэрээ дүгнэсэн актад хувьцааны нэр, тоо ширхэг, үнэ ханш, хүлээн авагчийн данс зэргийг тодорхой тусгасан байна.

АРАВ. ХАРИЛЦАГЧИЙН ХҮСЭЛТ БОЛОН БУСАД ШААРДЛАГАТАЙ ТОХИОЛДОЛД ХУВЬЦААГ ТУСГААРЛАХ

10.1. Хадгалагч нь дараах тохиолдолд хувьцааг тусгаарлаж болно.

10.1.1 Хорооны улсын байцаагчийн албан шаардлага;

10.1.2 хууль хяналтын байгууллагын мэдэгдэл;

10.1.3 хувьцаа эзэмшигчийн өөрийн хүсэлт.

10.2. Хувьцааг тусгаарлалтаас чөлөөлөхдөө тусгаарлуулсан этгээд эсхүл дээд шатны албан тушаалтны шийдвэр, хувьцаа эзэмшигчийн хүсэлтийг үндэслэнэ.

10.3. Хувьцаа эзэмшигчийн хүсэлтээр тусгаарлагдсан хувьцааг тусгаарлах тухай хууль хяналтын байгууллагаас аливаа хүчин төгөлдөр шийдвэр ирүүлсэн тохиолдолд харилцагчийн хүсэлтийг үл харгалзан хууль хяналтын байгууллагын шийдвэрийг хэрэгжүүлнэ.

АРВАН НЭГ. МЭДЭЭ, СУДАЛГАА

11.1. Хадгалуулагчийн хүсэлтээр хатгалагч нь компанийн хувьцаа эзэмшигчдийн судалгааг дэлгэрэнгүй болон хураангуй хэлбэрээр гаргаж өгнө.

11.2. Хувьцаа эзэмшигчийн хүсэлтээр түүний хувьцаа эзэмшлийн талаарх тодорхойлолтыг монгол болон англи хэл дээр гаргаж өгнө.

АРВАН ХОЁР. ХАДГАЛАГЧИЙН ҮЙЛЧИЛГЭЭНИЙ ХӨЛС, ХУРААМЖ, ШИМТГЭЛ

12.1. Энэхүү журамаар зохицуулсан хувьцааны бүртгэл, хадгалалт, бүртгэлд өөрчлөлт оруулах, өмчлөх эрх шилжүүлэх, бүртгэлээс хасах, хадгаламжид буй хувьцааны мэдээ, судлагаатай холбоотой аливаа үйлчилгээний шимтгэл, хураамжийн хувь хэмжээг хадгалагч, хадгалуулагчийн хооронд байгуулсан гэрээ болон хадгалагчийн тогтоосон журмаар зохицуулна.

АРВАН ГУРАВ. ХАРИУЦЛАГА

13.1. Хадгалагч өөрийн хадгаламжид хувьцааг бүртгэсэн нь уг хувьцаатай холбоотой аливаа эрсдлийн баталгаа болохгүй.

13.2. Хадгалагч хувьцаа эзэмшигчдийн дэлгэрэнгүй бүртгэлийн үнэн зөв байдлыг хариуцна.


13.3. Хадгалуулагч нь компанийн дүрэмд дурьдсан хувьцааны бүрдүүлбэрт өөрчлөлт оруулсан тухай бүр хадгалагчид албан бичгээр мэдэгдэн өөрчлөлт оруулах бөгөөд энэ тухай мэдэгдээгүйн улмаас үүсэх хохирлыг хадгалагч тал хариуцахгүй.

13.4. Хадгалуулагч нь баримт бичгийг хуурамчаар бүрдүүлэх, нуун дарагдуулахыг хориглох ба үүнээс үүдэн гарсан хохирлыг хадгалагч тал хариуцахгүй.

13.5. Хувьцаа эзэмшигч нь худалдах, худалдан авах гэрээгээр бусдад өмчлөх эрхээ шилжүүлсэн, хувьцаа эзэмшигч хоорондоо аман болон аливаа хэлцэлээр өмчлөх эрхэд өөрчлөлт оруулсан тохиолдолд тухай бүр хадгалагч талд бүртгүүлэх бөгөөд бүртгүүлээгүйгээс үүдэн гарах эрсдлийг хадгалагч тал хариуцахгүй болно.

~oOo~

“Хаалттай ХК-ийн хувьцааг бүртгэх, хадгалах,
өмчлөх эрх шилжүүлэх үйл ажиллагааны журам”-ын
Хавсралт - 1



ҮНЭТ ЦААСНЫ ТӨВЛӨРСӨН ХАДГАЛАМЖИД
ХУВЬЦАА БҮРТГҮҮЛЭХ ӨРГӨДӨЛ

Огноо :/...../.....

Хаана: “.....” ХХК-д

.....
.....
(хаяг, утас, факс, шуудангийн ба электроншуудангийн хаяг)

Хэнээс:

/хуулийн этгээдийн нэр/

.....
.....
(хаяг, утас, факс, шуудангийн ба электроншуудангийн хаяг)

Компанийн хувьцаа эзэмшигчдийн хурлын 20.... оны дугаар сарын-ны өдрийн тоот тогтоолыг үндэслэн үнэт цаасаа бүртгүүлэн хадгалуулах хүсэлт гаргаж байна.

ӨРГӨДӨЛ ГАРГАГЧ:

.....

/албан тушаал /


/тамга тэмдэг/

/.....//...../

/гарын үсэг/


/овог, нэр/

“Хаалттай ХК-ийн хувьцааг бүртгэх, хадгалах,
өмчлөх эрх шилжүүлэх үйл ажиллагааны журам”-ын
Хавсралт - 2



ХАДГАЛАМЖИД БҮРТГЭХ ХУВЬЦААНЫ МЭДЭЭЛЭЛ

Үзүүлэлт		Хувьцааны бүртгэл
Хувьцааны код:		
Хувьцааны нэр:		
Хувьцааны төрөл:		
Нийт хувьцааны тоо : /ширхэг/		
Хувьцаа эзэмшигч:	Овог нэр	
	Тоо /ширхэг/	
	Хувь /%/	
Хувьцаа эзэмшигч:	Овог нэр	
	Тоо /ширхэг/	
	Хувь /%/	
Хувьцаа эзэмшигч:	Овог нэр	
	Тоо /ширхэг/	
	Хувь /%/	
Нэрлэсэн үнэ: /төгрөг/		
Хувьцааны нийт үнийн дүн: /төгрөг/		



**ХУВЬЦААНЫ ХАДГАЛАМЖИЙН БҮРТГЭЛД
ОРОХ ӨӨРЧЛӨЛТИЙН МЭДЭЭЛЭЛ**

..... хаалттай хувьцаат компанийн хувьцаа эзэмшигчдийн хурлын 20.... оны дугаар сарын-ны өдрийн дугаар тогтоолыг үндэслэн хувьцааны хадгаламжийн бүртгэлд дараах өөрчлөлтийг оруулав.

Үзүүлэлт	Хувьцааны бүртгэл
Хувьцааны код:	
Хувьцааны нэр:	
Хувьцааны төрөл:	
Нийт хувьцааны тоо:	
Нэгжийн нэрлэсэн үнэ: /төгрөг/	
Бүртгэлд орсон өөрчлөлт	
Нэмэгдсэн/хасагдсан/ хувьцааны тоо:	
Нэг бүрийн үнэ:	
Дүрмийн санг нэмэгдүүлэх/хасагдуулах/ дүн:	
Хувьцааг хуваах, нэгтгэх замаар өөрчилсөн тухай мэдээлэл:	
Нэрлэсэн үнэ өөрчилсөн тухай мэдээлэл:	
Хувьцааны нэр өөрчилсөн тухай мэдээлэл:	
Нийт гаргасан хувьцааны тоо : /ширхэг/	
Хувьцааны нийт үнийн дүн: /төгрөг/	